



嘗讀仲長統樂志論有云良朋萃至則陳酒殽以娛之  
足知伊人不乏而無有遐心永朝永夕亦樂志之一也  
然而事往時移星流雲散為歡無幾俄焉凋謝以今視  
昔能不慨然余少耽吟咏雅愛同聲幸辱通人名彥率  
多相思命駕有一至再至者無論乃若頻年浹月屐齒  
恆親風雨晦明流連繾綣嘗得數人焉松陵則俞鹿床  
徐稚庵梅里則周篔簹谷沈藍村蘇臺則俞旅農琴川則  
顧雪坡皆定交一日遂同函蓋競擅才情濡毫洋灑凡  
登山臨水月夕花晨懷人贈友志喜言愁有動於中莫  
不於詩發之往往闡韻拈題逞奇鬪豔徵歌飛爵丙夜



喧奴以云樂志良不誣也奈歲之不與聚亦難常鹿床  
年最高則最先逝管谷繼之隄庵藍村又繼之旅農雪  
坡齒最少於諸公亦復化爲異物嗟乎歲月如流人生  
何幾天道難知類有然矣余薄宦萬里今者鍵戶索居  
回首昔遊邈不可得適哀集吟藁將付梨棗因念諸君  
子雖精魄銷亡而手澤未泯其所著全編未能遍搜聊  
取在桐谿倡訓者採擇成編豈惟余追維曩昔以誌不  
之知諸君子者庶乎覽其一二猶將彷彿其

綴 傳復書數言以弁其首

亥秋九月朔日小方壺汪森序

俞南史

古今體詩一百十

徐崧

古今體詩四十四首

周箕

古今體詩二百六首

沈廷

古今體詩一百四十六首

俞瑒

古今體詩一百六十一首

附子 廿

古今體詩三十二首

顧文淵

古今體詩一百四十首

華及堂視昔編總目

華及堂視昔編

休陽汪 森晉賢輯訂

俞南史字無殊號鹿床吳江人羨長先生之長子次  
曰南藩字無斁迹於浮屠則世稱箬庵和尚者也鹿  
床遭亂棄諸生移家光福山中老屋數椽左圖右史  
旁多隙地植梅竹以自娛角巾方袍古心古貌有襄  
陽耆舊之風吳中固多隱君子鹿床先生實居其一  
酒闌燈炧時有訊及前朝遺事輒能道其原委娓娓  
不少倦雅好古鼎彝琴硯及法書名繪辨別特精詩  
尚性靈長於五律尤自負其工於賦物錢宗伯牧齋

列朝詩選中亦稱之始余相識於家鈍翁茗華書屋  
中遂爲忘年之契嘗同選三唐人詩去取悉合嗣欲  
商榷編輯宋元人詩館余桐溪草堂數載惜搜討未  
竟業而先生溘焉長逝矣余旣爲位哭之復與犀月  
走弔山中爲之經紀窀穸生平所著詩藁屬其壻許  
子年繕寫副本恒置篋衍間偶一披讀恍然如對吾  
鹿床也茲就其倡和諸詩先剗刷焉有孫孫謀每當  
楞梅熟時必載十數筐餉余自余宦粵西十餘年未  
通音問不知其無恙否也

春日過華及堂贈周士晉賢昆仲

伊人一水隔魚雁枉相通路出花香裏舟行煙雨中到  
來情始見別後句尤工庭際荆花好開樽映席紅

華及堂喜晤周青士

知己多寥濶相過未擬回數年今夜聚一棹故人來酒  
愛花前飲詩因燭下催那堪歡讌後寂寞萬峰隈

桐溪留別次周士韻

細雨沾衣袂含情相送歸忽看桑葉長更憶蕨苗肥沙  
鳥猶依客溪煙欲掩扉山川雖間隔音問莫教稀

奉輓汪徵君景仁先生

耆舊淪亡日親朋慟哭辰德星昏永夜風木失青春嗚

咽溪邊水淒涼里巷人恨余交已晚嗟爾德長新孝友  
天懷發提攜至性申分財恩撫幼待爨惠通鄰燕翼雖  
相負詒謀固可遵棣華仍擘擘蘭譽更津津正爾堪添  
算誰知忽損神靈輻傷久閉總帳暗生塵選擇春王吉  
喧傳越水濱飛旌移隴陌引翼遠城闈勝壤知遙待清  
江曲可循松門悲弔鶴薤露感遺民馬鬣封誠穩牛眠  
穴足珍高山因仰止千古矚嶙峋

華及堂坐雨書呈周士兄弟

庭芳狼藉漸成茵忽憶家園草木春千樹梅花偏作客  
一溪風雨慣留人紅螺泛酒燈前醉素繭題詩硯北新

不是主人深結好那能勸聚動經旬

次韻訓周士

愛君兄弟夢常通若戀家山豈易逢華屋罇開追北海  
小庭花發倚東風桐溪棹入初乘漲芝徑門閒漸長蓬  
幼婦新詞供彩筆燈光四照蜀牋紅

次韻訓晉賢

江梅一路幾枝開不覺思君乘興來書帳縹緗晨接座  
芸窗燈火夜侵苔新春尚靚粘金勝舊雨重過把玉壘  
時有主人成雅集王猷那復棹船回

次韻訓季青

絳蠟雙擎酒不空  
小庭花事任天公  
愧逢佳客杯難罄  
愛得新篇句每工  
靜對鑪香淹夜雨  
側聞簷馬走春風  
羨君年少諧堪敵  
老子婆娑興欲同

月次閭門次加晉賢青士

城下欣逢李郭舟  
圖書共載見風流  
細露三月桃花雨  
遙接雙津揚紫洲  
箇箇畫船連柁尾  
家家紅粉出樓頭  
吳中遊事春來勝  
好白平山取次求

送徐松之往十八澗訪梅生和出

桐溪言別日遂作武林遊  
不戀湖山勝  
偏尋竹樹幽  
雙扉聞磬入高枕  
聽泉留中有安禪  
客相逢定倡酬

前歲與岑公訂遊洞庭不果  
今予在桐川見訪  
技

以新句次韻奉訓

擬因蓮社笑譚餘  
欲訪靈威洞裏書  
心寄波濤隨鳥濶  
夢臨松月入宵虛  
每思高座聆金偈  
不獨空齋聽木魚  
異日何須儲酒待  
將依角里結鄰居

同岑大師過華及堂次韻

幽窗靜綠覆蕉陰  
茗椀香鑪簾影深  
花自庭中開並蒂  
人從世外結同心  
禪餘獨照經天月  
賦就先聞擲地金  
別後遙歸銷雪院  
往來魚鳥見知音

丙辰七夕

秋入梧桐滿院聞小筵瓜果樂同羣謾傷靈匹年年別  
却勝姮娥夜夜分詩句喜多聯錦字酒樽惜少勸紅裙  
欲煩烏鵲遙傳語莫信人間乞巧文

鳴箏曲二首

贈輕媽  
較書

梧桐川上有仙家時降瑤姬汎紫霞愛染纖纖紅指甲  
銀箏坐弄亂飛花

玳筵初上步難前小小腰身可憐紅蠟光中香霧裏  
鶯聲飛出繞冰絃

秋日許巢友過華及堂有作因次其韻

有客汀洲詠采蘋一時訓和見清新山中久愛攜琴客

溪上還留載鶴人紫蟹黃鷄長入饌犀籤玉局豈容塵  
繇來下若多名酒傾倒尊前不厭頻

擬采菊東籬下

晨興盥櫛罷步屣繞東籬粲粲黃金花浥露明朝曦但  
見所涉趣不嫌采摘遲悠悠南山雪盈盈手中卮坐對  
兩相得陶然詠新詩

題文待詔畫桃源圖卷

先生工畫世所無展卷愛寫桃源圖桃源不知杳何處  
令我對此空踟躕聞說當年遇暴秦數傳猶謂避秦民  
不知漢晉是何世肯教復作後時人武陵漁人見花發



獨棹扁舟猶恍惚撥雲入洞事分明豈意還家復相失  
我今家住青芝麓沙水縱橫隱深曲竹樹桑麻亦宛然  
鷄鳴犬吠仍相續誰知租稅入官家胥吏年年每見譁  
空有桃花千萬樹雲山重疊那能遮

次酬許巢友集華及堂見贈之作

相逢仙子宅燈火夜堂深把酒三更雨論交千古心支  
公曾設講叔夜許彈琴朗月思君夕應難展素襟

次韻送許巢友還禾中

欲上扁舟別舊知爲敲詩句故遲遲嵇康嬾性無書札  
陶令高情寄酒卮已有笑談生滿座那禁風月不相思

鴛鴦湖上歸心切因負山中萸菊期

重陽前三日潘次耕過華及堂分韻得斑字

愛值高秋雲物閒小堂幽寂類溪山座中人傍尊彝古  
檻外蜂依菊蕊斑眺覽漸思巖石畔嘯歌真比竹林間  
留君肯待重陽日擬向城東取小蠻

同潘次耕查具美登鳳鳴寺佛閣

古寺何年造僧殘徑自開登樓一眺望對景幾遲回梧  
老兼秋落鴻低帶影來回思鳳鳴日延佇轉生哀

九日集華及堂分韻

令節初臨文讌開盈庭秋色錦成堆東吳名士吟詩別

北里佳人送菊來，應有珠璣盈篋笥。且聽絲竹佐尊壘，宵深秉燭猶嫌短。玉漏奚煩屢次催。時次耕別去遠輕媽送菊至

同次耕桐溪訪菊題壁

秋色盈庭菊正芳，好攜壺榼一相羊。花溪風月今猶在，不獨當年黃四娘。

過南郊草庵次韻

行尋南野靜遙聽，磬聲長舊關迴文徑。新營雙樹堂小，窗圭壁影老衲水田。裴愛此禪棲，夜蟾光共一牀。

美人送菊二首

九日蘭舟傍水濱，黃花紅袖望中新。行人盡上河橋立，

不看花枝但看人。

名花麗質映溪濱，更比陶家發興新。齊列畫屏香豔並，當筵還取捧卮人。

郊行

清秋兼勝侶，跬步到城西。瓜蔓懸茅屋，菱絲亂碧溪。巷中無吠犬，樹上有鳴鷄。遺穗兒童喜，喧喧尚滿畦。

題沈石田先生溪山圖

吳中畫手推四家，石田先生稱第一。筆法多師黃大癡，波瀾濶大尤超軼。湖上輕舟往溯洄，篷窗展卷畫圖開。千丘萬壑隱不見，澗泉林樹藏風雷。高下峰巒忽斷續，

小通畧約雲連屋寂寂不聞人語聲似有鳴禽在深竹  
谷口煙橫鎖石橋晚來細路雜漁樵巨川廣澤從茲去  
回首青山一片遙

又送菊二首

鷗鷺隨舟傍白蘋碧山紅樹隔溪新來時應遇茱萸女  
獨把花枝妬殺人

誰向洲邊更采蘋眼中惟有菊花新香隨紅豔停舟處  
正值門前送酒人

桐溪贈別二首

蘭香何事落風塵纔得相逢別遠津此際芳洲柳握手

回身即是夢中人  
筵前相見即相親弄管調絲笑語頻遙憶天涯明月夜  
可能念我白頭人

冬日還山留別周士晉賢兼訂青士

經歲谿堂靜掩扉攤書解帶總隨宜每欣把盞論文日  
却忘尋花問柳時梅蕊欲開因有信青山久別亦相思  
還家暫說團圞話歲首相逢莫後期

周弇山過華及堂有作因次韻兼送遊洛

春風楊柳綠絲絲每到華堂便有詩天際橫參留醉客  
檐前索笑憶蛾眉一宵歡聚聲齊樂千里分歧情易悲

夢裡應知化蝴蝶遙經花縣亦相隨

次韻答青士

藥欄已見放將離有約誰知竟後期春去鶯花如作客  
宵閒燈火獨題詩每臨白墮思同醉更憶青簑久失披  
忽報君來差足慰錦囊斑杖喜追隨

題贈文織二首

小立亭亭弱欲扶清聲好比鳳皇雛石家若見應爭買  
一顆明珠換得無

誰記前緣與夙冤幽姿只合住名園妝成不共花開謝  
那管春風廿四番

五日集華及堂分得中字

時因令節屆天中客聚溪堂賦轉工艾葉最宜分酒綠

榴花每欲奪裙紅虎頭繪事珍堪玩

是日顧子雪坡繪文織圖

屈子騷詞

怨莫同深愧此身猶泛梗家山應憶灌園翁

簞谷別歸梅里有作次韻送之

別久欣方晤胡爲即欲歸眼看逢夏令身未換春衣燈  
火書聲寂壺觴笑語稀還家雖足樂恐減舊時肥

鳳吹詞四首

清溪一曲竹扉幽中有佳人住小樓見說客來羞不出  
曉窗鸚鵡喚梳頭

芳姿帶笑自嫣然微步盈盈強始前今日如逢劉碧玉  
相憐未及破瓜年

窄衣小袖束妝輕每欲相呼未識名一自遊仙春夢裏  
碧桃花下對雙成

秋水雙瞳穠李膚小屏風外立斯須繇來絕世稱難得  
知費誰家幾斛珠

文織偕妹鳳吹至次青士六絕句

姊妹齊肩至雙臨綺席前清歌勝絲竹不擬弄鷓絃  
繡屏呈舞鳳畫檻出游龍見說芙蓉好雙擎比玉容  
小年依阿母門限未曾離今朝隨阿姊那許有人欺

顏色豔如花費身輕似葉癡小未逢人問言紅上頰  
紅蠟燒來短關情別思生暫時雖得照去後恐難明  
妾思悲離合郎情有淺深琴心如有屬何患少知音

又次晉賢韻

畫鷁初停姊妹偕扶攜聯袂到蘿齋臨行自顧垂鴛帶  
忍笑誰知顫翠釵勸酒頻持雕玉盃摘花微溼縷金鞵  
邨堪蠟淚銅盤滴不忍相離下碧階

端陽前一日文織病起過華及堂席上次雪坡四

首

姿容畧減似秋花辟惡新符插髻丫不是主人良讌會

肯教扶病暫離家

可憐瘦怯小胥身好比章華宮裏人此日不堪重理曲  
且依萱草度芳晨

臂縷初安籠薄紗眼波微暈媚晴霞爲因夙昔思難見  
似值菖蒲乍發花

隔歲佳人理玉箏嬌歌豔曲有餘情那知今日華筵上

四座惟聞語笑聲

時輕媽已去雲間

次韻送雪坡往樵李

一灣新月恰初三喜遇君家得縱談藤笈負書來海北  
布帆如畫泝溪南三齊轍跡應難並五嶽林泉尚擬探

此去遊蹤還不遠梧桐秋老望回驂

汪曉庵四十生辰書贈

弧矢繇來在四方年逢強仕一稱觴堂中嘉客臨珠履  
筵上新歌見舞裳但得移軍營細柳何煩染翰賦長楊  
即今執爵行三祝豈獨侯封入醉鄉

雨泊清溪

細雨連溪碧停舟對水潯岼花臨浪動村樹入煙深笑  
語侵漁父歌吟避渚禽蒼茫葭菼外何處認歸岑

文織到桐三月遂去因書此寄意

一春纔得幾回逢別去匆匆挂短篷蝴蝶偶來迷曉夢

李太白詩集  
卷之四  
桃花終欲嫁東風  
葦蘿村畔容光減  
梓澤園中笑語空  
此後懸知靡定所  
不如飛鳥戀芳叢

臞庵營蓮花蕩先塋賦贈

聞說南州繼世賢  
靈丘今始卜新阡  
暮濤遠合三江水  
勝壤如依九品蓮  
丙舍墓田應有帖  
空花泡影總歸禪  
而今方見孫謀遠  
歲歲松門挂紙錢

愍嬰二首

爲周士  
殤女作

愛女偏離膝能無  
念幼聰握珠遺掌上  
抱玉碎懷中言語  
憐多慧丰姿看不同  
傷心寄寄什嘆悼  
正無窮  
貝語能初誦針工  
已學爲雙親應憫  
惜大士失仁慈下

蕊開旋落蘭芽茁  
復萎如余學道者  
聞此亦生悲

次和晉賢七夕有懷

今夕雙星合無煩  
悵隔河人生含怨  
易天上覺情多對  
此杯盤好空懷笑  
語何別來秋又到  
黯黯歎飛梭

秋夜同錢尋干周白門華及堂分賦

越水吳山豈易逢  
欣瞻聯璧得過從  
詩同謝客情爭豔  
酒負陶家興未濃  
窗燭影殘催夢蝶  
庭莎露冷泣秋葦  
生平最有嵇康嬾  
何日空林覓遠蹤

次和晉賢重陽感舊作

去年曾此捧深杯  
桃頰微醺醉幾回  
汀雁在傳當日信

霜葩遙惜背人開  
調絲理曲翻留恨  
銜粉含花未是媒  
悶坐小窗思往事  
倚几空自畫爐灰

為碧巢題丹鳳圖

一輪紅日出扶桑  
獨立高岡文采彰  
疑是岐陽鳴日見  
於今應得一翱翔

丁巳九日玉峰新樓雅集分韻

樓成恰值在重陽  
攜客登臨一舉觴  
玉樹漸教盈紫翠  
牙籤早已識縹緲  
遙觀禾畝雲千頃  
高接煙鴻字幾行  
從此每逢萸菊會  
年年應憶鳳梧鄉

秦駐山望海同碧巢作四首

高立層峰東海邊  
驚濤駭浪響圓圓  
平分翠島仍連地  
下轉紅輪尚有天  
玉闕金宮勞想像  
寶車芝蓋動雲煙  
秦皇漢武成何事  
得到蓬壺始是僊

滄波何日日見澄  
清涉險誰能坐不驚  
生息本滋千里潤  
盈虛豈與百川爭  
蜃樓成市惟留影  
鵬翼垂天但有聲  
見說桑田已三變  
揚塵猶自詫方平

聞道金銀宮闕開  
列仙行坐遍林隈  
星河有客乘槎入  
蓬島何人跨鶴來  
曉對霞光明似錦  
遙瞻雲物壘成堆  
瓊田數頃波濤外  
靈草千年不用栽

周覽瀛壖觸目新  
天琛水物隱清晨  
上思繫帛傳書雁



中惜貽綃欲泣人光吐驪珠終不夜花開琪樹鎮長春  
掣鰲自是平生志擬欲投竿老此濱

次和季青秋居雜興四首

秋庭梧竹不離風涼氣初翻几席中莎徑遠聞歸牧笛  
蘋洲閒下釣魚筒書成欲與花同格句好難將畫比工  
鑪冷不須重貯火餘香猶長蕙蘭叢

幅巾斑杖步徐徐爽氣能令四體舒社燕含情辭藻井  
鷺鷥顧影照清渠尋詩有興過僧舍避客無人到草廬  
出處隨時間不管何須更擬絕交書

秋深籬菊接隣家村北村南路不賒獨酌甕餘桑落酒

閒眠童進月團茶魚浮碧沼驚常避鶴向空庭舞欲誇  
十樣蜀牋誠似錦揮毫奚啻散成霞

山徑非同蜀坂泥蠟來雙屐自堪攜每逢竹所留新製  
重曆爨屏認舊題唱去菱歌偏隔浦束成秣把已盈畦  
荆南風景知相似擬向君家到故谿

荆谿為余舊居與  
長興接壤故云

屐現行

宋興硯貴端谿石下爨搜采無留跡蓬萊稱首今莫傳  
端宗遺硯呼名屐時值流離歸閩中曾經進御帝王宮  
取材堅膩如金璧程式精良勝鬼工憶昔開元太平日  
李白題詩殿廷側貴妃捧出榮一時去國淒涼永相失

道君筆墨世所稀草書妙繪無不爲誰知陳列多奇製  
零落空宮遠草隨幸逢茲硯今猶在舊譜流傳多失載  
一時見者盡驚嗟光眩雙眸寧不愛晉昌藏日比瑤琨  
世世珍傳示子孫忽逢有客將金易竟夕遲回破楚門  
攜歸聲價兼金比骨董行中頻挂齒後來轉售吳與徐  
一一陶翁識終始有陶馨之履硯履歷一卷浮谿季子貽風流毛楮陳  
陶事事優一旦逢茲似膠漆如遇良朋快所求因之遂  
令名其室周彝漢鼎非其匹日日摩挲硯北邊興來一  
掃如椽筆

對菊寄懷次晉賢韻

時輕媽寄菊四本乃十月朔日也

仙舟一去杳無涯尚憶清歌響琵琶雙楫久虛公子渡  
七香空憶美人車燭悲良夜頻垂淚菊恨重陽晚着花  
何日錦筵來笑語醉看雲鬢半欹斜

次韻留別晉賢

家山經歲別松菊喜猶存屋老白雲塢人歸黃葉村清  
晨聞梵唄靜夜禮玄元花發遙相待閒行醉竹根

野步遣興次和

樹色連村接難分陰與晴徑花迎客媚溪柳傍漁明地  
隔紅塵遠身隨白鳥輕茸茸蒲葉短還憶故山耕

喜雪坡至次晉賢韻

蕭寺淹留聞淡句豈因佛事訪南詢歡呼未共壚頭飲  
寂寞惟餘婪尾春鵲語早諳情已切燭花夜放喜相親  
嗚年麗句猶盈帙應憶當筵勸酒人

桐谿春暮憶季青同次耕鄞溪唱酬之樂因次青  
士韻書寄

樹色重重繞屋圍登樓吟嘯得玄暉春盈流水堪爲酒  
霞展晴巒欲染衣覘沼乍添花影落茶鐺初沸翠煙飛  
遙知日日閒窗下共劈花牋興不違

周士茗上之別條已初夏歲月易去懷想日深再  
用前韻

日坐清溪玉一圍春深離索嘆流暉霏微香徑曾沾袂  
淡蕩輕陰又換衣曉枕每憐鶯共語遙魂長與蝶交飛  
還思銷夏閒堂日瓷盃斝樽鎮不違

送春三用前韻

爲惜春歸膏減圍連朝陰雨蔽晴暉蜂愁釀蜜虛花股  
蝶苦尋香損粉衣反舌曉枝無剩響殘芳幽徑惜餘飛  
今年遊事消磨盡天意人情每兩違

雪坡以詩留別四用前韻送之

水碧峰青天影圍行憐遊子盼朝暉黃留聲咽悽蘭浦  
紫棟風寒冷芡衣霞外惟餘一鳥度洲前遙送亂花飛

人生一笑誠難得聚少離多又欲違

次韻送王禹慶北遊

楊柳千株綠繞城歌聲忽起動離情篋中久已存蘭譜  
枕內多應秘論衡此日酒杯留不住他時魂夢或同行  
看君匹馬長堤外猶見輕裘劍氣橫

雪坡雨中欲別青士有詩仍次其韻

孤遊不出大江東客路相逢在此中十日醉醒情未歇  
一窗燈火夢還同身隨雲鶴高難定書寄溪魚遠可通  
世上輕肥誠足羨多君偏念采芝翁

十九日雪坡別去覓舟不得而返晉賢有詩余亦

次韻

昨夜夢先返此身仍復留可憐千樹色不得一帆收因  
我暫時喜增君去日愁明朝真欲別還約小山遊

余還吳寓小山

書屋因訂晤期

春風次季青作

自有春風入林塘處處妍花新看似剪草軟徑如羶舞  
袖高樓動靈旗野廟懸去來偏有限一別每經年

黃太冲雨集華及堂次韻

花徑香殘掩曲闌小庭雨過積餘寒風翻雙鵲猶鳴樹  
水漲孤舟欲上灘賓主情濃桑落酒兒童看笑竹皮冠

相思千里難同夢今夕連床得盡歡

四月十六夜同晉賢煮茗對月作

一春煙霧裏今夕見孤懸  
澗照江湖白幽生草樹妍  
酒杯喧易累茶盃靜相憐  
良友欣同望奚堪遽獨眠

黃源明以所居半壁圖索詩次韻書贈二首

竹樹幽深蔭瓦溝  
衡門蕭瑟似清秋  
室中尚列縹緗架  
林外還來琴鶴舟  
半幅畫圖聊獨賞  
四時風月每相周  
金宮玉闕他年事  
預向閒窗一夢遊

時源明訪道過桐溪故云

門外猶多巢鶴枝  
客過因欲賦新詩  
山遊遙挾丹青去  
花發常將酒榼隨  
石鼎品泉同陸羽  
雪床覆被似楊岐

枕中鴻寶繇來秘不信仙家亦有私

季青六月十九日為二十生辰以詩贈之

家世浮溪振後賢  
生因大士有前緣  
齡過十八才逾濶  
界閱三千道自堅  
靈運詩篇來夢草  
遠公社課並栽蓮  
收書求友無他好  
豈肯優游度歲年

澹歸大師過桐谿草堂有作次韻二首

小築閒堂正值春  
望中花鳥是芳鄰  
新篇吟罷留餘響  
飛錫經過斷客塵  
架上圖書翻秘帙  
座間談笑得陳人  
邠知舊夢連今夢  
榮悴繇來只此身

丹崖舊隱暫歸東  
相見桐谿接短筇  
水月禪心明上洞

梅花詩句出中峰曾尋瑞草逢仙鹿欲獲明珠遇睡龍  
人世任從波浪濶此心安處即山中

徐蘭生嗣君子慶相遇桐溪用澹歸大師韻見贈

次答

遙望雲山笠澤東那能快聚日攜筇夢穿翠竹迷雙徑  
家繞寒花隔萬峰芳譽久聞稱繡虎新篇直欲並雕龍  
得同名父成高隱樂道寧踰畝畝中

過賀天士瞻度寓齋遣值吳菌次喬梓在座因分

韻賦詩

小庭花氣正細縕久積相思此樂羣選句一時開府庫

含毫滿室吐煙雲盧仝茗椀時頻供荀令衣香不待熏

誰意笑談情正洽驪歌起處又將分

時天士欲北行  
各作詩贈別

送賀天士之荏平

細雨行裘出舊林吳門悵別爲知音一生尚負酬恩志  
千里猶懸挂劍心水泛桃花乘汐漲舟移楊柳感啼禽  
知君此去情偏切應比羊曇哭更深

上巳日過婁東遊王氏東崗

同余不遠徐  
松之注晉賢

蒼藤古木聳孱顏恰占城東勝一灣人度曲廊聲在水  
鳥鳴深竹樂過山管絃誰記當時盛歌咏猶供此日閒  
遙憶西津乘酒舫何如茲地共躋攀

次周士閒居即事二首

一春遊事興仍耽十幅蒲帆北又南弋鳥釣魚終忌殺  
遊仙佞佛總成貪高情每憶松間鶴獨處真如繭內蠶  
芝草滿山遙足念何時重理舊藤籃

性愛吟詩老更耽生來行不遠江南每於泉石偏生戀  
即見金銀不着貪靜似沙頭閒立鷺嬾如箔上乍眠蠶  
猶思櫻笋山中日野老相遺滿摘籃

家右吉信宿桐谿草堂臨別賦贈

卅載思難見相逢情益真共商千古事宛似一家人立  
論正堪法吟詩老更新扁舟寧忍別惆悵落花津

春日繇吳門經皂林訪山暉禪師留贈

欲效昌黎訪大顛輕舟移傍竹林邊故將茶盃頻留客  
即對桃花不說禪遊跡經春消酒困浮生半日掃塵緣  
自今一水差堪泛寧獨三過類昔賢

季青居長興詩以寄之

花惜殘春隨棹去山如舊好遠相迎此時何事遙堪羨  
深柳籠堤坐聽鶯

地僻何妨稱畧壘人幽真欲類庚桑棕鞵藤杖尋詩處  
衣袂微沾花草香

愛住山城長閉戶興來時復到僧家園蔬攜送應多笋

樵擔挑來總帶花

酒逢舊侶宜同飲詩鬪新篇更異人終日醉吟隨坐臥  
平鋪細草軟於茵

食青精飯次周士作

仙家所服食不獨胡麻飯青飴更稱珍隱居每攜獻未  
及下筯時神氣覺生健取法貴得宜深淺有方寸欲與  
青蓮同浸久始漸濕此非塵埃物世俗那能販眼看富  
貴家堆案盡肥膈余也山林人於茲最相縈色較芝草  
深不比松花嫩每逢浴佛日山家競交勸即此當晨餐  
飽噉自成頓愛惜等珍羞細嚼不敢噴人生祈百年計

日過三萬服之若能仙無乃太踰願愛君險韻成巴和  
聊一譚

送雪坡遊秀州五山精舍

路出金閭外前程越水通蓬窗蘆葉雨草店杏花風身  
遠緇塵外心閒清磬中遙知高興發訓倡有休公

次和晉賢贈別之作

自知別不遠猶恐易違期盧橘初黃日楊梅後熟時曉  
晴憑短策夜雨憶深卮言笑空山少於心豈欲遲



休陽江

休陽江 森晉賢輯訂

徐崧松之吳江人居近宋乾道間王文孺先生懼  
庵遺址因以古懼庵目王先生而自號為今懼庵所  
輯與時輩和答詩統曰雲山訓唱而分為數集曰橫  
秋閣聚遠樓雲關楓林蓮巢纈林諸刻則揭古懼庵  
中景勝之名有云真竹齋釣雪亭者則今懼庵所擬  
為之者也君賦性真率狀貌蒼古對客不妄交一言  
有如三家村學究人或謂之輒面發赤唯唯含笑而  
已平生吟屐自淮揚以南武林以北凡城郭村落造

訪諸名宿足跡殆徧棲心內典深有得於禪門三昧  
故其假寓多在花宮梵刹中甘於藜藿絕無他慕庚  
戌春與余仲兄鷗亭相遇於雲間之石筍里遂成襟  
契及壬子來桐溪對酒論文歲無間濶先是君有詩  
南縞紵集之選海內多欽其名嗣邀余兄弟共訂四  
方人士吟咏名曰詩風曾付剞劂惜當兵革中板多  
散佚未得廣為流布崑山果亭先生與君為同宗鴈  
行之好甚相得也家居時每懸榻待君晦明風雨留  
連不少輟逮晚歲遊某郡某邑或弔古感今或此作  
彼賡者彙為一編更名百城煙水自君亡後遂零落

少傳惟吳郡一帙里人張中翰文一為之補綴重梓  
得復流行焉君所著作見於他刻者甚夥而在余華  
及堂諸詩檢篋中十不存二三不勝慨然姑就所存  
者錄之鄧林一枝丹山片羽亦聊以誌不忘云爾

留宿汪周士嵩來閣作

一見即依依相招正夕暉松醪沾客袖石筍出漁磯市  
密燈光接更闌鼓響稀何當情獨至既醉亦無歸

葉丹需招同周士路湘舞沈方絃分韻

筍里初暈日多君列綺筵斜陽村雨後片雪夜燈前坐  
久寒逾徹杯深醉欲顛孤踪忘寂寞殊喜接羣賢

曾女史翩鴻和周士韻二首

天半朱霞拂羽衣秋風何處稻梁肥  
情知君是隨陽雁不向南飛即北飛

雪下黃昏掉不開幾人夢裏到陽臺  
玉花亦是多情物欲向仙娥學舞來

冬日回晉賢渡吳淞江

時新開尚  
未築閘

久患吳淞益新開故道通  
岍高黃帶日波冷碧隨風行  
藻生舟上元鷺八鏡中具區從此注  
安得濤垂虹

復雨

此詩方築場始見農夫苦湖

田既已沉水稻又將腐  
身上青簑殘階前白波阻  
頰荒畏亂離多病安柔懦  
虛窗月色昏陰野移燐火  
夜長鄉夢醒聽盡三更鼓

枕上偶成索晉賢和

離夢忽然醒微躬寄匡牀  
無端動秋思浩蕩難可量  
鼓聲從何來詎知夜未央  
庭蕉滴疎雨砌草鳴寒螿  
君今稱玉峰朗朗揚輝光  
二十甫有餘累月如太常  
清吟擁翠被郁郁餘芸香  
不知當此時能否在睡鄉

辛亥冬周青士見訪超果因偕訪曹次典于雨花  
堂邀同洮侯筠士小飲

客裏還逢客相尋興不孤詩成從老細酒盡遣僧沽曲  
徑餘朝雪空林集夜烏吾心無去住寧肯歎窮途

一覽樓送別青士

風雨空樓共歸舟迫歲闌但留詩句在長作對君看

苦雨嘆正月晦日作時將遊新安寄周士晉賢二

首

去秋梧溪時累月天無雲原田土如石朝夕紅光曛一  
從返棹惜分侶十日便有九日雨金閭共聽屐聲喧笠  
澤誰堪風色苦意中自謂入春來踏燈以後還探梅誰  
知雨雪間征調良辰慘淡心為灰燈亦不得張梅亦不

見摘城門早閉住人驚婦女紛紛爭避出出門一步猶  
艱難那得徜徉五百灘滂沱泥濘又一月荒村土室空  
愁看

昨日晴便喜今日陰便悲今日何曾異昨日爭當風雨  
聲淒其豪家置酒日歡樂高堂華燭張帷幄美人歌舞  
管絃繁風聲雨聲都不覺豈似蕭條一室中栖栖婦子  
愁途窮夜眠竹榻閃雷電春夢驚回漏未終

小崑山訪旅庵和尚不值因懷晉賢

主人何處去一壚倚巖幽山舍炊煙接村田曉霧收九  
峰來九日三泖泛三秋獨憶梧溪子無能得共遊

奉輓汪徵君景仁先生

始我來梧溪謂公正耆耄如何無幾時惟堂忽衰經涼  
颺起秋晨丹楓飄暮節誰人能百年七十非天折哀辭  
紛共連明器儼成列猶憶北歸者早夜履霜雪

壬子除夕二首

時在桐溪

不作葺城客還維語水船路遙年近日心定雪飛天擁  
被春偏冷翻書午欲眠回思當昨歲梵閣望晴川

去冬度歲在雲

問超果寺

此夕仍爲谷江春逼歲生題詩兼雨雪旅食任陰晴土  
語多難辨金樽醉復傾敢云孤鳳集三載見交情

次答晉賢

我正憐君獨君偏妬我遊月無常滿夜天有不晴秋雨  
洗千人石風回一葉舟昨宵秋興發奚用更遲留

與碧巢望龐湖作

北望龐湖繞濛濛水氣生秋空殊浩淼月出更分明

桐鄉留贈周士碧巢

盡道梧溪僻何年鳳鳥來寺深雙塔立邑小萬家開幽  
事當書帙高情托酒杯輞川如有詠應不異王裴

同青士過海寧訪許潛飛時值卜築因留宿真相

寺

村居方卜築盡醉復同遊竹裏僧歸寺天涯客上樓雁  
飛秋水落鐘響夕陽收相識憑玄度禪燈一榻幽

同青士宿峽川西意草堂

峽川當日暮歸路未離羣落葉聲兼雨飛煙翠入雲客  
衣巖際溼僧磬棹邊聞苦欲留同宿吟詩到夜分

七月十九日雨後周士期過村舍

凌朝新霽溼雲收紅蓼灘邊舞白鷗宿雨亦知君欲至  
為添溪水襯蘭舟

園花道中二首

曲曲清溪棹小舟青山滿目海鷹秋我來借得樵風便

兩岸蘆花盡點頭

停舟度額上鷹峰石逕縈紆夕照中為問秋光何處去  
白雲黃葉與丹楓

癸丑十月朔日同懸公青士登鷹窠頂觀日月合

辟歌以述之兼似晉賢

往時過金粟鷹峰不數里人言十月朔合辟看莫比風  
塵轉徙俄十年夢寐欲往無由緣尚平婚嫁殊未了五  
岳萬里尤茫然今秋興自九峰發每欲幽尋徧吳越况  
逢賈勇有周篋如此良辰可悠忽買舟結侶不為遽夜  
度峽川天未曙路岐寧可驀前行逢人便問園花去雖

到園花未到山沿洄一棹停村灣擔囊裹糧各努力汗  
流氣急勞躋攀及至峰頭無地歇官長雲屯從環列朱  
旂石上埽青苔白馬林中踏黃葉荒庵逼塞心踟躕紛  
披襍被將馬如且遣長年憇簷下還尋老衲窺窗虛初  
來先自繞山走海色蒼茫在山後琅琅中有誦經聲土  
屋籬門斷鷄狗怡然意釋寓可移昏黑更苦榛篁迷山  
童炊糜啜初罷拂拭苔壁還留詩明晨早起須早行琉  
璃佛火蒲團邊潮來山下夢初醒一聲催起寧遷延禦  
寒尊酒聊能具樵人相引披煙霧昨入崎嶇不可攀今  
來偏仄差能步既登絕頂驚龍從波光夜色成洪濛高

低大小四旁石儼如侍坐聆談空金風颯颯衣裳冷擁  
被相俛共相枕晨鷄未喚鐘未鳴短柏長松尚無影乍  
見沙灘鹽竈火驚是扶桑日光吐一時拭目起立齊精  
神搖蕩身飛舞盡疑海日夜半生或言正值鷄初鳴誰  
知朝暮無二理日出曛曛大地明移時漸白連星文其  
奈海際橫浮雲觀者怪叱異平昔半竿始見輪氤氳此  
際人人悔且歎跋涉空勞俱欲散惟有前年曾見人目  
不移睛尚留盼須臾視日日玉色照來是月不是日月  
輪正合日輪中月小日大光四溢太陰側却爲日食太  
陰全對爲合璧日東月西月在下此體萬古常不忒每

逢合朔始一會月魄覆之如鏡蓋獨茲摩盪極縱橫無  
不歡呼兼再拜浮雲盡作五色者洋洋海水俱紫瀾晶  
熒中貫一金增信為天下真奇觀月摩益急日益起旁  
人笑問是何理豈如物類為一身同道同行當萬里徘  
徊尚欲看初開此境了然無所猜雖恨初升未能見不  
枉辛苦登高臺歸來已是散齋鐘日高處處將無同明  
年更與汪倫約攜手重觀來此峯

過鳳鳴寺聲海禪室見錢聖月題壁之作并聲師

所著因成此詩

老衲誰堪語精廬竟莫知偶從幽徑入忽見故人詩茗

椀情偏重冰壺句更奇因之訊爾祖况復是無為

梧溪晤錢元超先生述李燭崑喬梓俱故感悼一

首

武塘我舊遊與君交竄早翱翔翰墨場花月每開抱世  
事日已非故人日已少前春過城西大宅生荒草分手  
祝重逢容與興俱好乍聞梧溪言怵惕心如擣益悟浮  
幻軀達士齊壽夭徒云九轉丹神仙未能老遺集孰為  
傳千秋藉文藻

甲寅春將之新安同周士晉賢遊黃山白嶽諸名

勝



新安江灘水急不解勸人歸只解送人出新安客去家  
室雖生山水鄉不辨山水色人踰五十非朱顏何可終  
老風塵間黃山白嶽擅名勝况有主人高且閒願乘此  
方無事日與君嘯咏同躋攀

為碧巢題丹鳳圖

不是梧桐不肯棲幾時鳴向最高枝丹山一出人爭識  
曉日偏來照羽儀

留題鳳鳴寺慕果軒次孫雪崖明府韻

自企聲名久相逢意氣深青雲隨北地白社續東林鳥  
喚春還寂魚遊水半沉精藍賡妙句不負此重尋

西郊訪張鍊師次孫雪崖明府韻

我來曾幾度臘盡尚餘寒雉堞迎風館漁舟釣雪灘吟  
詩愁白髮解職喜黃冠孫綽真仙令陽春合與彈

竹軒

此君不可無一人亦難種蕭蕭只幾竿水石同清供

蕉窗

愛之如碧玉蔽葉搖清陰炎風日展開中有無限心

石雲居

窗前一片雲是石終難毀上有萬里天下有一泓水

金粟玉蘭山舍

誦讀來此中琴樽隨所欲蘭桂有芳名猶藉金與玉

和王閨媛墨梅詩小引

樓頭楊柳猶許藏鴉苑裏梧桐只宜宿鳳其機  
有似以類無訛乃若姑射瓊姿羅浮玉樹空夢  
翠禽之夜未迎粉蝶之春迥出風塵俄形筆墨  
暗香浮處蒼出烏衣疎影落時粧依鬢髮仙御  
情同鐵石節本冰霜其詩曰樹老猶然勁如何  
鸚鵡棲冰姿翻作墨攜入畫屏西已知家學音  
出于藍寧謂文言立之尚白喜其佳咏均有和  
章

勁質誰能折春風影亦寒却憐心似鐵只作廣平看

乙卯閏五日

五日偏逢閏天如爲孟嘗未曾尋藥圃猶復聚華堂黍  
裹龍螭角杯浮琥珀光若言當夏令即此正端陽

己未暮春三日同俞無殊汪晉賢余不遠遊婁東

王氏東岡賦呈王異公二首

蘭亭佳本今猶在

不遠工書法  
尤善摹古

令節相逢喜共來老興尚

因修禊健愁顏多爲看花開林巒歲久存真意翰墨人  
高見古裁倘晤右軍煩致語題詩先寄玉峰隈

蒙茸林樹隱峻嶒斷址閒亭隔幾層潮落別供採水客

池水汪洋時因潮落  
且多挑水于此者

籬寬半借住山僧峰頭細徑藏深篠橋  
上迴廊覆古藤坐石憑欄饒野趣尚留幽閣再同登

孟冬遇汪雲遠太史

碧漢翱翔遠南來野寺偏相逢纔半日不遇已三年醉  
訪吟詩客歌聞載菊船槎谿如未去尚欲索新篇

送男孝永赴洞庭書館是日喜晴

村林發春氣大澤尤氤氳悠然片帆挂孤棹穿鷗羣煙  
開露山色風急生波紋揭來當今節旅客愛斜曛

張麗敷先生招飲永言齋作

舊遊踰十載茲復泊湖灣秋水一孤艇夕陽千萬山蒼

松何鬱鬱瑞靄自閒閒為有前期在依然挈手還

送王大席遷新安司教二首

千里新安路不遙英才幾許被甄陶金閭門外誰相贈  
折取梅花當柳條

幾載吳門客往還車塵頻欲拂朱顏此回莫道鱣堂冷  
飽看齊雲雨後山

題俞石巢山居讀書圖冊

余性本耽書卜居滄江側臞庵古名勝竹樹多秀色結  
宇臨蒼茫百城更修飭時因念求友歷覽資旅食昔歲  
過君家山居共登陟閒門映蒼翠堆案惟筆墨著述探

幽深趨庭竝岐疑今來二十載往事堪記憶觀君讀書  
吟澹蕩歸典則古學見家傳淵源更何極名山所藏處  
光怪不可匿感我懷舊情喟焉三歎息

萃及堂視昔編

